

आकाशवाणीखबरां

1. लोकसभा च जन्म ते मृत्यु संशोधन विधेयक-2026 पारित करी दित्ता गेआ।
2. बक्ख-बक्ख मुद्दे पर विपक्ष दे हंगामे दे चलदे दवें सदनं गी अज्ज दिन भरै लेई स्थगित करी दित्ता गेआ।
3. हैदराबाद पुलस नै प्रधानमंत्री नरेंद्र मोदी हुंदे खलाफ आपत्तिजनक सामग्री फैलाने दे आरोप च मेटा इंडिया दे अधिकारियें दे खलाफ एफ.आई.आर दर्ज कीती गेई ऐ।
4. काकरोच जनता पार्टी दे बरोध-प्रदर्शन दुरान घायल पुलस अधिकारियें दे परिवार आहलें न्याय दी मंग कीती ते इयै जनेहू प्रदर्शनें दुरान सुरक्षा दी मंग रक्खी।
5. पाकिस्तान दे नजैज कब्जे आहले जम्मू-कश्मीर च शांतिपूर्ण प्रदर्शनकारियें उप्पर पाकिस्तानी सशस्त्र बलें आसेआ जालिमाना हमले च 120 थमां मते प्रदर्शनकारियें दी मौत।
6. ओडिशा च हाड़ दी स्थिति बड़ी मती माड़ी बनी दी ऐ, 13 जिलें च तकरीबन 8 लक्ख लोक प्रभावित।

<><><><><><>

Regn of Births

संसद दे दवें सदनं दी कार्रवाई नीट मुद्दे पर छात्रें दे बरोध-प्रदर्शन दुरान कथित पुलस कार्रवाई सने केई मुद्दे पर विपक्ष दे हंगामे करी पूरे दिन लेई स्थगित करी दित्ती गेई। पैहले स्थगन मगरा दपैहरी 12 बजे लोकसभा दी कार्रवाई परतियै शुरू होने उप्पर सदन च जन्म ते मृत्यु पंजीकरण संशोधन विधेयक-2026 पारित करने लेई पीठासीन अधिकारी दलीप सैकिया होरें परतियै चर्चा शुरू कीती। गृह राज्यमंत्री नित्यानंद हंगामे दे बश्कार, विधेयक पेश कीता। सदन च बिजन कुसा चर्चा दे हंगामे दे बश्कार बिल गी पास करी दित्ता गेआ। संसदीय कार्य मंत्री किरन रिजिजू होरें चर्चा च हिस्सा नेई लैने पर विपक्ष दी कड़ी निंदा कीती। उनें कांग्रेस समेत विपक्ष गी बार-बार अपील कीती ही जे इनें महत्वपूर्ण विधेयक उप्पर चर्चा गी यकीनी बनाया जा। जन्म ते मृत्यु पंजीकरण संशोधन विधेयक-2026 दा उद्देश्य जन्म ते मृत्यु पंजीकरण अधिनियम 1969 च संशोधन करना ऐ। एहू नमां कनून पंजीकरण दे प्रावधानें गी होर निगार बनाने ते जन्म ते मृत्यु दी घटनाएं दी समें पर रिपोर्टिंग गी प्रोत्साहित करने लेई लेआंदा गेआ ऐ। विधेयक च प्रावधान ऐ जे जेकर कुसा जन्म जा मौत दी सूचना रजिस्ट्रार गी 1 बरे शा जां 2 बरें दे अंदर दित्ती जंदी ऐ तां जन्म ते मौत दी प्रमाणिकता दी पुष्टि दे मगरा गै जिला मैजिस्ट्रेट उपविभागीय मैजिस्ट्रेट अधिकृत कार्यकारी मैजिस्ट्रेट हुंदी हामी मगरा गै एहदा पंजीकरण कीता जाई सकोग।

<><><><><><>

BJP-MP

झारखंड दे भाजपा सांसदें अज्ज संसद परिसर च महात्मा गांधी प्रतिमा दे सामने बरोध प्रदर्शन कीता ते बीजेपी दे कथित जे.पी.एस.सी पेपर लीक मामले दी सीबीआई जांच दी मंग कीती। केंद्री महिला ते बाल विकास मंत्री ते बीजेपी सांसद अन्नपूर्णा देवी होरें दोष लाया जे झारखंड च जम्मू-कश्मीर सरकार दुरान जे.पी.एस.सी पेपर लीक सने होर दुइयां पेपर लीक दी घटनां सामने आइयां ना।

<><><><><><>

Meta

हैदराबाद साइबर क्राइम पुलस नै मेटा इंडिया दे अधिकारियें ते होर केई सोशल मीडिया अकाउंट संचालकें खलाफ एफ.आई.आर दर्ज कीती ऐ। एहू कार्रवाई प्रधानमंत्री नरेंद्र मोदी हुंदे खलाफ फेसबुक ते इंस्टाग्राम उप्पर आपत्तिजनक सामग्री वायरल होने मगरा कीती गेई। बीजेपी दे सोशल मीडिया विंग दी शकैत मगरा पुलस नै मामला दर्ज कीता ऐ। हैदराबाद साइबर क्राइम दे पुलस उपायुक्त अरविंद बाबू पुष्टि कीती जे बीजेपी दे सोशल मीडिया विंग दी शकैत उप्पर मामला दर्ज कीता गेआ ऐ। उनें दस्सेआ जे मामले दी जांच जारी ऐ।

<><><><><><>

Delhi

दिल्ली दे जंतर मंतर पर 20 जुलाई गी होए दे छात्रें दे बरोध-प्रदर्शन दुरान घायल पुलस कर्मियें दे परिवार आहलें आरोप लाया जे प्रदर्शन दुरान पुलस अधिकारियें गी जानी बुझियै निशाना बनाया गेआ। अज्ज नमीं दिल्ली च इक संवाददाता सम्मेलन गी संबोधित करदे होई उनें दावा कीता जे सबनें शा पैहली उत्थे तैनात कर्मियें गी भीड़

दे हिंसक तत्वें घेरी लैता, उं'दे पर पत्थर मारे ते उनेंगी मारेआ बी। परिवार आहलें दावा कीता जे इस घटना च केई पुलसकर्मी गंभीर तौरा पर घायल होए न। इक असिस्टेंट सब इंस्पेक्टर दे पुत्र नै आरोप लाया जे प्रदर्शन दुरान उं'दे पिता दे सिर पर इन्नी गैहरी सट्ट लगी जे उनेंगी टांके लाने पे।

<><><><><><>

POJK

पाकिस्तान दे नजैज कब्जे आहले जम्मू-कश्मीर च शांतिपूर्ण प्रदर्शनकारिएं पर पाकिस्तानी सशस्त्र बलें दे जालिमाना हमलें करी पाकिस्तानी सशस्त्र बलें दी गोलीबारी च 40 थमां मते नागरिक मारे गए न ते केई होर घायल होए न। संयुक्त अवामी एक्शन कमेटी दे प्रदर्शनकारी मौजूदा समें च पाकिस्तानी सुरक्षाबलें दी क्रूरता ते लक्षित हत्याएं गी लेइयै रावलकोट दे डी-चौक पर शांतिपूर्ण प्रदर्शन करा'रदे हे। अजें तगर सुरक्षाबलें आसेआ कीती गेदी कारवाइयें च 125 थमां बद्द प्रदर्शनकारी मारे गे न। पाकिस्तानी सुरक्षाबलें हुन महिलाएं गी बी निशाना बनाना शुरू करी दिता ऐ। एह महिलां उत्थे अपने बुनियादी हक्कें दी मंग गी लेइयै प्रदर्शन करा'रदियां न। पाकिस्तानी सुरक्षाबलें रावलकोट ते मीरपुर च महिला प्रदर्शनकारियें पर गोलियां चलाइयां न। इस सरबंध्यै च सोशल मीडिया पर केई वीडियो बी वायरल होए न।

<><><><><><>

Govt. Ethanol

भारत सरकार नै एह स्पष्ट कीता ऐ जे एथेनोल मिश्रित पेट्रोल कार्यक्रम भारत दी खाद्य सुरक्षा कन्नै समझौता नेई करदा। एहदा उद्देश्य देश दी उर्जा सुरक्षा गी मजबूत करना ते करसानें गी बेहतर प्रतिफल प्रदान करना ऐ। भारती खाद्य निगम दे चौल दा एथेनाल उत्पादन च इस्तेमाल कीते जाने दे सरबंध्यै च हालिया दावें पर पेट्रोलियम ते कुदरती गैस मंत्रालय नै आखेआ ऐ जे खाने पीने आहली चीजें दी सुरक्षा सरकार दी प्राथमिकता ऐ। मंत्रालय नै साफ कीता ऐ जे खाब अनाज, टुट्टे दे चौल ते ओह अनाज जिसी इस्तेमाल नेई कीता जाई सकदा, उनें चीजें दा इस्तेमाल गै एथेनाल उत्पादन कीते जाने आहले कच्चे माल च शामिल ऐ।

<><><><><><>

JK -Highways

केन्द्र सरकार नै लोकसभा च एह जानकारी दिती जे जम्मू-कश्मीर गी बरे 2023-24 दुरान 10 ज्हार 528 करोड़ रपे बागुजार कीते गे हे ते 2023-24 दे दुरान राश्ट्री जरनैली सिडकें दे विकास ते रक्ख-रखाऽ लेई इस पूरी रकम दा इस्तेमाल करी दिता गेआ। आकाशवाणी दे जम्मू संवाददाता दी रिपोर्ट मूजब सिडक, ट्रांसपोर्ट ते जरनैली सिडकें सरबंध्यी केन्द्री मंत्री नितिन गडकरी होरें गलाया ऐ जे राश्ट्री जरनैली सिडक सरबंध्यी परियोजनाएं गी ट्रैफिक मत्तल्लक जरुरतें, सम्पर्क ते पी.एम. गतिशक्ति योजना दे मुजब गै मंजूर कीता जंदा ऐ। उनें दस्सेआ जे बरे 2024-25 च 10 ज्हार 331 करोड़ रपे बागुजार कीते गे हे जिसले के 2025-26 लेई 8 ज्हार 83 करोड़ रपे बक्ख रक्खे गे। इसै चाल्ली मजूदा माली बरे लेई इक ज्हार 846 करोड़ रपे बागुजार कीते गेदे न ते जंदी 30 जून धोड़ी इंदे शा इक ज्हार 484 करोड़ रपे खर्च करी दिते गेदे न।

<><><><><><>

CWG

ग्लासगो राश्ट्रमंडल खेड्डें च जंदे रोज भारती भार तुलकने आहले खडारी लवप्रीत सिंह नै मर्दे दे 110 किलोग्राम वर्ग च चांदी दा तगमा जित्तेआ, जिसलै के सीमा नै महिला डिस्कस थ्रो च कैहू दा तगमा हासल कीता। 8में रोज आस्ट्रेलिया 110 तगमें कन्नै तालिका च शीर्ष पर बनी रेआ। भारत 17 तगमें कन्नै 10मीं थाह पर बने दा ऐ। भारत दे तगमें च 3 सुने दे, 10 चांदी दे ते 4 कैहू दे तगमें शामिल न। तोआई, नीरज चोपड़ा नै पुरुषें दे नेजा सुट्टने आहली प्रतियोगिता दे फाइनल च थाहर बनाई लैती ऐ।

<><><><><><>

PM-Lovepreed

प्रधानमंत्री नरेंद्र मोदी होरें ग्लासगो राश्ट्रमंडल खेड्डें च भारत तुलकने आहले खडारी लवप्रीत सिंह होरें गी चांदी ते चक्का सुट्टने आहली खडारन सीमा कलीरामन होरें गी कैहू दा तगमा जित्तेने पर बधाई दिती ऐ। सोशल मीडिया पोस्ट च प्रधानमंत्री होरें मर्दे दे 110 किलोग्राम शा मते भार वर्ग च चांदी दा तगमा जित्तेने पर लवप्रीत सिंह होरें

गी उंदी सराहना कीती। मोदी होरें आखेआ जे स्नेय स्पर्धा च लवप्रीत होरें शानदार प्रदर्शन करियै राष्ट्रमंडल खेडूं च नमां रिकार्ड बनाया ऐ। उनें आखेआ जे लवप्रीत सिंह हुंदी मेहनत, वाकई काबिले तरीफ ऐ।

<><><><><><>

Odisha

ओडिशा च महानदी दा जलस्तर लगातार बधने दी स्थिति होर मती गंभीर होई गई ऐ। एहदे करी खल्की थाहरें दे व्यापक क्षेत्र पानी कन्नै बुरी चालली भरोची गेदे न। महानदी ते एहदी सहायक नदियें दे संवेदनशील क्षेत्रें लेई हार्ड अलर्ट जारी कीता गेआ ऐ। नदी दे बधदे जल स्तर करी पंज जिलें च हाड दी चेतावनी दिती गई ऐ। स्हाडे संवाददाता नै जानकारी दिती ऐ जे 13 जिलें दे ब्लाकें दे तकरीबन 8 लक्ख दे नेडे लोकें प्रभावित होए न। अधिकारी राहत बचाव ते निगरानी अभियान च तेजी लेआ'रदे न। हीराकुंड जलाशय दे 12 गेट खोली दित्ते गे न ते पानी दा स्तर होर बधने दी स्थिति च 12 गेट खोली दित्ते गए न।

<><><><><><>

Keralam

केरलम दे सब्भनें 14 जिलें च भारी बरखा दी चेतावनी जारी कीती गई ऐ। भारती मौसम विभाग नै अज्ज गुजरात ते मध्य महाराष्ट्र च भारी थमां मती भारी बरखा पौने दा रेड अलर्ट जारी कीता ऐ। अरूणाचल प्रदेश, पूर्वी राजस्थान, कर्नाटक, केरल, माहे, पंजाब ते पच्छिमी मध्य प्रदेश च अज्ज भारी बरखा पौने दी पेशनगोई कीती ऐ। इयां गै पच्छिम बंगाल, सिक्किम, बिहार ते ओडिशा च अगले त्रै-चार दिनें लेई भारी बरखा पौने दी मेद ऐ।

<><><><><><>

SANJY-Suspended

सालाना श्री अमरनाथ जात्तरा खराब मौसम दे चलदे बालटाल आहले रसते राएं बंद करी दित्ती गई। पहलगाम आहले रस्ते राएं जात्तरा जरूरी मरम्मत आहले कम्म दे मद्देनजर पैहले थमां गै बंद ऐ। बालटाल आहले इलाके च वीरवारें रातीं भारी बरखा पेई जेदे चलदे इक थाहर पर चानचक्क हाड आई गेआ। अधिकारिणं दा आखना ऐ जे इस घटना च कुसै चाल्ली दे जानोमाल दा नुकसान नेई होआ ऐ। खराब मौसम ते चला'रदे कम्मे दे चलदे पवित्तर गुफा आहली थाहर लेई बालटाल थमां कुसै गी बी अग्गे जाने दी इजाजत नेई दित्ती गई।

<><><><><><>

Vande Bharat Lifeline

भारी बरखें, ल्हास-पस्सियां ते कुप्पड पौने आहली लगातार घटनाएं दे चलदे लोकें गी खासी परेशानी पेश आवा'रदी ऐ। ऐसे च जम्मू-श्रीनगर वंदे भारत एक्सप्रेस इक महत्वै आहली ते जीवन रेखा दे तौर पर उभरिए सामने आई ऐ। शिडक राबता बार-बार प्रभावित होने करी यात्रिणं गी खासी परेशानी हुंदी ऐ। एहदे अलावा सैलानी, श्रद्धालु, विद्यार्थी, मरीज, कारोबारी गी बी मुश्कल होआ'रदी ऐ। इस रेल सेवा करी इनें लोकें गी राहत थ्होआ'रदी ऐ। वंदे भारत एक्सप्रेस सेवा लगातार लोकें गी राबता उपलब्ध करोआ'रदी ऐ जेदे राएं उंदी आवाजाई सखल्ले होआ'रदी ऐ।

<><><><><><>

Wrestling

अजरबैजान दे बाकू च चला'रदी अंडर-17 विश्व कुश्ती चैंपियनशिप च भारत दी निकिता सहरावत नै चांदी दा तगमा जित्तेआ ऐ। महिला वर्ग दे 57 किलोग्राम भार वर्ग दे फाइनल च उनेंगी अमरीका दी खडारी कोला 6-0 कन्नै हार दा सामना करना पेआ। महिला वर्ग दे 49 किलोग्राम भार वर्ग च भारत दी कामना बाबल नै कैहू दे तगमे दे मुकाबले च रूस दी इरीना गी 3-2 कन्नै हराया। 73 किलोग्राम भार वर्ग च भारत दी गै गरिमा नै स्पेन दी पाउला पेरेज गी तकनीकी श्रेष्ठता दे आधार पर हराइयै कैहू दा तगमा अपने नां कीता।

<><><><><><>